

VENDIM
Nr. 755, datë 9.12.2021

PËR PËRCAKTIMIN E DOKUMENTACIONIT, TË PROCEDURAVE E TË KRITEREVE PËR KRYERJEN E INSPEKTIMEVE SHTETËRORE TË SISTEMIT TË ARSIMIT DHE FORMIMIT PROFESIONAL

Në mbështetje të nenit 100 të Kushtetutës dhe të pikës 3, të nenit 26, të ligjit nr. 15/2017, “Për arsimin dhe formimin profesional në Republikën e Shqipërisë”, me propozimin e ministrit të Financave dhe Ekonomisë, Këshilli i Ministrave

VENDOSI:

I. PJESA E PËRGJITHSHME

1. Ky vendim ka si objekt përcaktimin e dokumentacionit, të procedurave e të kriterëve për kryerjen e inspektimit në sistemin e arsimit dhe formimit profesional (në vijim “AFP”) në Shqipëri.

2. Inspektimi i ofruesve publikë dhe jopublikë të AFP-së bazohet në këto parime:

- a) parimi i pavarësisë;
- b) parimi i programimit të inspektimeve;
- c) parimi i proporcionalitetit në veprimtarinë e inspektimit;
- ç) parimi i dispozitës më të favorshme ligjore;
- d) parimi i informimit të publikut dhe mbrojtjes së konfidencialitetit.

3. Objekt i inspektimit, sipas këtij vendimi, janë të gjithë ofruesit publikë dhe jopublikë të AFP-së në Republikën e Shqipërisë.

II. NJËSIA PËRGJEGJËSE PËR INSPEKTIMIN

4. Njësia përgjegjëse për inspektimin e ofruesve të AFP-së është sipas pikës 1, të nenit 6, të ligjit nr.15/2017, “Për arsimin dhe formimin profesional në Republikën e Shqipërisë”.

5. Me qëllim përmirësimin e sistemit arsimor profesional, njësia përgjegjëse:

a) informon AKAFPK-në dhe AKPA-në lidhur me raportet e inspektimit dhe gjetjet nga inspektimet e kryera pranë ofruesve publikë dhe jopublikë të AFP-së, me qëllim garantimin e cilësisë në proceset e vetëvlerësimit, akreditimit, monitorimit e licencimit;

b) bashkërendon veprimtarinë me AKPA-në për vlerësimin e jashtëm të sigurimit të cilësisë së ofruesve privatë të licencuar për ofrimin e kurseve afatshkurtra të të nxëniet gjatë gjithë jetës.

III. PROCEDURAT, DOKUMENTACIONI DHE KRITERET E INSPEKTIMIT

6. Ministri përgjegjës për AFP-në:

a) miraton planin vjetor të njësisë përgjegjëse për inspektimet në AFP;

b) fillon me kërkesë apo kryesisht procedurën e inspektimit të paplanifikuar në planin vjetor të njësisë përgjegjëse për inspektimin;

c) përcakton objektivat afatmesëm të inspektimit;

ç) i rekomandon subjektit përmirësimin e situatës në bazë të gjetjeve të inspektimit.

7. Inspektimi i ofruesve të AFP-së është në katër lloje:

a) inspektim i orientuar;

b) inspektim tematik;

c) inspektim i plotë;

ç) inspektim i detyrave të lëna.

8. Inspektimi i orientuar nënkupton një inspektim specifik për një proces konkret të veprimtarisë së ofruesve të AFP-së, për të cilin ka një ankesë apo ka informacion për shkelje të legjislacionit për arsimin profesional. Inspektimi i orientuar është i paplanifikuar.

9. Inspektimi tematik është i planifikuar dhe synon kontrollin, monitorimin dhe vlerësimin e fushave të caktuara të funksionimit të ofruesit të AFP-së, të cilat konsiderohen përparësi për politikën e AFP-së.

10. Inspektimi i plotë nënkupton vlerësimin e jashtëm, tërësor të veprimtarisë së ofruesit të AFP-së. Inspektimi i plotë mbështetet në raportin e vetëvlerësimit të ofruesit të AFP-së.

11. Inspektimi i plotë për ofruesit e AFP-së, në rastin kur përfshihet dhe inspektimi i aspekteve të kulturës së përgjithshme, realizohet në bashkëpunim me ministrinë përgjegjëse për arsimin.

12. Inspektim i detyrave të lëna (rekomandimeve) nënkupton inspektimin e rekomandimeve përkatëse dhe detyrave të lëna për përmirësimin e situatës pas inspektimeve të mëparshme.

13. Inspektimet kryhen me urdhër të ministrit përgjegjës për AFP-në. Në rastet kur inspektimi realizohet sipas pikës 11, të këtij vendimi, inspektimi kryhet me urdhër të përbashkët të ministrit përgjegjës për AFP-në dhe ministrit përgjegjës për arsimin. Në urdhrin e ministrit përcaktohen:

- a) subjekti që do të inspektohet;
- b) lloji i inspektimit;
- c) afati për përfundimin e inspektimit;
- ç) perioda për të cilën do të kryhet inspektimi.

14. Dokumentet e procedurës së inspektimit janë sipas shtojcës 1, që i bashkëlidhet këtij vendimi.

15. Njësia e inspektimit:

- a) përgatit programin e inspektimit, i cili miratohet nga eprori i tij drejtpërdrejtë;
- b) përgatit raportin e inspektimit;
- c) përgatit planin vjetor të njësisë përgjegjëse për inspektimet në AFP dhe e dërgon për miratim te ministri.

16. Në hartimin e planit vjetor të inspektimit kanë përparësi subjektet:

- a) të cilat janë konstatuar me shkelje gjatë inspektimeve të mëparshme;
- b) të cilave u janë lënë rekomandime për përmirësimin e situatës nga inspektime të mëparshme;
- c) të cilat kanë arritje krahasimisht të ulëta të nxënësve/kursantëve lidhur me programet që ofruesit e AFP-së ofrojnë, por dhe të arritjeve të ulëta të nxënësve në provimet e maturës shtetërore profesionale.

17. Në ushtrimin e inspektimit, njësia inspektimit:

- a) kryen hetim të plotë administrativ, sipas Kodit të Procedurave Administrative;
- b) kërkon dhe merr nga subjektet çdo informacion të nevojshëm për kryerjen e detyrave të tij;
- c) inspekton dosjet dhe çdo dokument lidhur me administrimin e veprimtarisë së ofruesve të AFP-së.

18. Ministri përgjegjës për AFP-në urdhëron subjektin e inspektimit për të korrigjuar shkeljet e konstatuara dhe për të eliminuar pasojat e tyre, duke përcaktuar një afat të arsyeshëm për këtë qëllim. Subjekti i inspektimit është i detyruar të njoftojë për korrigjimin e shkeljeve brenda afatit të përcaktuar dhe, nëse është e nevojshme, të paraqesë provat që e vërtetojnë këtë fakt. Për verifikimin e korrigjimit të shkeljeve mund të kryhet një inspektim sipas pikës 12, të këtij vendimi.

19. Në rast të moszbatimit të rekomandimeve të dhëna, sipas pikës 18, të këtij vendimi, në mënyrë të përsëritur, ministri përgjegjës për AFP-në mund të vendosë mbylljen e një ofruesi të AFP-së, kur nuk respektohen kriteret e përcaktuara me vendim të Këshillit të Ministrave, sipas shkronjës “e”, të nenit 7, të ligjit nr. 15/2017, “Për arsimin dhe formimin profesional në Republikën e Shqipërisë”.

IV. DISPOZITA TRANZITORE DHE T FUNDIT

20. Ministria përgjegjëse për AFP-në, me hyrjen në fuqi të këtij vendimi, ngarkohet të marrë masat e nevojshme, në bashkëpunim me Departamentin e Administratës Publike, për shtimin e njësisë përgjegjëse për inspektimin në strukturën dhe organikën e ministrisë.

21. Ngarkohet ministria përgjegjëse për AFP-në për miratimin e rregullores së brendshme të detajuar të punës për inspektimin në fushën e AFP-së, brenda 3 muajve nga hyrja në fuqi e këtij vendimi.

22. Ngarkohen Ministria e Financave dhe Ekonomisë, Agjencia Kombëtare e Arsimit, Formimit Profesional dhe Kualifikimeve, Agjencia Kombëtare e Punësimit dhe Aftësive dhe ofruesit e AFP-së për zbatimin e këtij vendimi.

Ky vendim hyn në fuqi pas botimit në Fletoren Zyrtare.

ZËVENDËSKRYEMINISTËR
Arben Ahmetaj

SHTOJCË I



REPUBLIKA E SHQIPËRISË
MINISTRIA E FINANCave DHE EKONOMISË
NJËSIA E INSPEKTIMIT TË SISTEMIT TË ARSIMIT PROFESIONAL

Nr. _____ prot.

Tiranë, më _____._____._____

URDHËR

Nr. _____, datë _____

PËR FILLIMIN E INSPEKTIMIT ...

Në bazë dhe për zbatim të nenit 26, të ligjit nr. 15/2017, “Për arsimin dhe formimin profesional në Republikën e Shqipërisë”, dhe VKM-së “Për dokumentacionin, procedurat dhe kriteret për kryerjen e inspektimeve shtetërore të sistemit të arsimit dhe formimit profesional”

Për këtë arsye,

URDHËROJ:

1. Nisjen e inspektimit, me temë: _____.
2. Inspektimi të kryhet nga data _____ deri më datë _____ nga inspektorët Z/Znj. _____.
3. Periudha që do të inspektohet fillon në datën _____ deri në datën _____.
4. Të kërkohet nga subjekti _____ gjithë dokumentacioni i nevojshëm.
5. Relacioni i përgatitur t’i paraqitet drejtuesit të njësisë së inspektimit të sistemit të arsimit profesional për vazhdimin e procedimit, brenda afatit të mësipërm.
6. Të merren masat për njoftimin e subjektit që do t’i nënshtrohet inspektimit, në përputhje me nenin 47, të Kodit të Procedurave Administrative.

MINISTRI



REPUBLIKA E SHQIPËRISË
MINISTRIA E FINANCave DHE EKONOMISË
NJËSIA E INSPEKTIMIT TË SISTEMIT TË ARSIMIT PROFESIONAL

Nr. _____ prot.

Tiranë, më _____._____._____

Lënda: *Njoftim mbi fillimin e inspektimit*

Drejtuar: Subjektit _____

I nderuar Z/Znj.

Ju njoftojmë se Ministria do të nisë procesin e inspektimit

MINISTRI



**REPUBLIKA E SHQIPËRISË
MINISTRIA E FINANCVE DHE EKONOMISË
NJËSIA E INSPEKTIMIT TË SISTEMIT TË ARSIMIT PROFESIONAL**

Nr. _____ prot.

Tiranë, më _____._____._____

MIRATOHET

Ministri

Drejtuar: Ministri

Nëpërmjet:

Përgatiti:

Lënda: Relacioni paraprak i inspektimit për subjektin _____

Data:

I/E nderuar Z/Znj Ministër,

Bazuar në urdhrin e ministrit nr. _____, datë _____, në përfundim të inspektimit rezultoi:

i. inspektimi

ii. analiza

iii. konkluzionet

Inspektori/ët:



**REPUBLIKA E SHQIPËRISË
MINISTRIA E FINANCVE DHE EKONOMISË
NJËSIA E INSPEKTIMIT TË SISTEMIT TË ARSIMIT PROFESIONAL**

Nr. _____ prot.

Tiranë, më _____._____._____

MIRATOHET

Ministri

Drejtuar: Ministrit

Nëpërmjet:

Përgatiti:

Lënda: Relacioni përfundimtar i inspektimit për subjektin _____

Data:

i/e nderuar Z./Znj. Ministër,

Bazuar në urdhrin e ministrit në përfundim të të cilit rezultoi:

i. inspektimi

ii. analiza

iii. shqyrtimi i observacioneve

iv. konkluzionet

v. rekomandimet

Inspektori/ët:



REPUBLIKA E SHQIPËRISË
MINISTRIA E FINANCEVE DHE EKONOMISË
NJËSIA E INSPEKTIMIT TË SISTEMIT TË ARSIMIT PROFESIONAL

Nr. _____ prot.

Tiranë, më _____._____._____

Lënda: Rekomandime _____

Në mbështetje të kompetencave ligjore të parashikuara, pas shqyrtimit të relacionit dhe mendimit paraprak të inspektimit, në përfundim të procedurës së inspektimit,

VËREJ SE:

Përmbledhje e shkurtër e inspektimit _____

Për këto arsye,

bazuar në nenin 26, të ligjit nr. 15/2017, “Për arsimin dhe formimin profesional në Republikën e Shqipërisë” dhe neneve 18 dhe 19 të VKM-së “Për dokumentacionin, procedurat dhe kriteret për kryerjen e inspektimeve shtetërore të sistemit të arsimit dhe formimit profesional”,

Rekomandoj:

Ministri